



**Äntwert vun der Madame Justizministesche Elisabeth MARGUE op d'parlementaresch Fro n°3514 vum 22. Januar 2026 vun der honorabeler Madame Députéiert Stéphanie WEYDERT iwert de Sujet vun der Situatioun vun de Fraen am Prisong.**

**1. Wat gedenkt d'Madame Ministesch ze ënnerhuelen, fir d'Situatioun vun de Fraen am Prisong ze verbessern ? Wat gouf zënter 2018 ëmgesat respektiv ausgeschafft ?**

Zënter der Grënnung vun der Prisongsverwaltung den 20. Juli 2018 goufen eng Rei Mesuren ëmgesat, wat d'Détentioun vun de Fraen am Centre pénitentiaire de Luxembourg (CPL) betrëfft:

- Den SPSE (Service socio-psycho-éducatif) bitt um Block F spezifesch Aktivitéite fir Fraen un.
- Op Ufro vun de Fraen bitt de Service éducatif vum Educatiounsministère elo speziell Formatiounen ausschliisslech fir Fraen un.
- D'Gemeinschaftssäll an d'Gemeinschaftskichen goufe komplett renovéiert a mat neiem Material equipéiert.
- All d'Zellen um Block F goufen nei ugestrach.
- Den « Régime en commun », also den normalen Haft Regime, gouf fir d'Fraen adaptéiert, sou datt si méi laang Stonnen ausserhalb vun hiren Zellen hunn a generell vu méi Fräiheete profitéiere wéi op anere Bléck.
- Nei Outdoor-Sportgeräter a Sëtzbänke goufen am Haff vum Block F installéiert.
- De Sportssall um Block F gouf mat neiem Material amenagéiert an zesumme mat de Frae renovéiert.
- Zesumme mat de Sportsmoniteuren goufe spezifesch Sportsmoduler fir Fraen entwéckelt a ginn elo ugebueden.
- Bei verschiddene kulturellen an artisteschen Aktivitéite gouf d'Mixitéit agefouert.
- Déi selwecht Approche gëllt fir d'Aktivitéite vun der Suchthëllef.
- D'Renovatiounsaarbechten am Atelier vum Block F sinn amgaangen.

Et gesäit een also, dass zënter 2018 villen ënnerholl ginn ass fir d'Situatioun vun de Fraen am Prisong ze verbessern.

**2. Ass ugeduercht, de Block F zu Schrasseg ze renovéieren an auszebauen ? Wa jo, a wéi engem Zäitraum ?**

De Block F ass an déi allgemeng Renovatiounspläng vu Schrasseg natierlech integréiert. Et ass dobäi virgesinn, eng komplett nei Sektoun fir Fraen ze bauen – mat wesentlech méi Eenzelzellen a méi Mamm-Kand-Zellen. Allerdéngs kann eben eréischt mat dësem Neibau d'raimlech Situatioun vun de Fraen, wéi och aner haiteg Aschränkungen, am CPL wierklech verbessert ginn.



### 3. Gëtt et schon ee Kalenner säitens dem Ministère, fir déi eenzel Recommandatiounen aus dem Rapport opzeschaffen an ëmzesetzen ?

All d'Recommandatiounen vum Rapport goufen analyséiert. Zënter der Publikatioun vum Rapport goufe folgend recommandéiert Mesuren ëmgesat:

- **Nr. 2:** Déi éischt Sessioun vun der Formatioun „Gesond liewen“, déi d'Stressmanagement fir d'Leedungspersonal behandelt, si schonn ofgehele ginn. Weider Sessiounen sinn 2026 geplangt. Dës Formatioun gëtt an Zukunft festen Deel vun der Offer vum *Institut de Formation pénitentiaire*.
- **Nr. 8:** De Büro vum *soignant-chef* vum CHL gouf an d'Sektioun D verluecht.
- **Nr. 11:** 9 Aktivitéiten mat Detenueen hunn 2025 am gemëschte Regime stattfonnt.
- **Nr. 13:** Eng zousätzlech Alarmanlag gouf am Sportssall vum Block F installéiert.
- **Nr. 17:** Frae kënnen am Prinzip och an Ateliere mat Männerbetrieb schaffen, wann d'Sécherheet an den *ordre interne* garantéiert sinn. Momentan läit keng Demande an deem Sënn vir.
- **Nr. 18:** D'Ëmbauaarbechten am Atelier vum Block F sinn amgaangen.
- **Nr. 20:** De *guide du détenu* gouf am gefuerderte Sënn geännert an d'Informatiounsaffichen hänken an der Sektioun F.
- **Nr. 38:** Gemëschte *groupes thérapeutiques* si vun elo u méiglech; an der Suchthëllef gëtt d'Mixitéit scho praktizéiert.
- **Nr. 43 & Nr. 44:** D'Modalitéiten fir d'Betreiung vu Kanner am ganz niddregen Alter sinn organiséiert a kënnen zu all Moment applizéiert ginn.

An de kommende Méint gi weider Recommandatiounen ëmgesat:

- **Nr. 1:** D'Kandidature sinn op fir méi männlech Agenten am Block F astellen ze kënnen.
- **Nr. 6:** Eng zweet Kachplack an en zweeten Uewe ginn an der Kiche vum Block F installéiert.
- **Nr. 7:** D'gefuerdert Trennungen an den Dusche ginn an de nächste Méint installéiert; d'*étude de faisabilité* ass bal ofgeschloss.
- **Nr. 10, 11 an 12:** D'Mesure fir de Sportssall ze optiméieren a fir Detenueen besser iwwer sportlech Aktivitéiten ze informéieren, sinn amgaangen. E wichtege Kommunikatiounskanal gëtt de neien Tëlees-System vum der Post, deem deemnächst am ganzen CPL installéiert gëtt.
- **Nr. 22:** D'Betreiung vun inhaftéierte Mamm mat hire Kanner gëtt kontinuierlech verbessert.

### 4. Wéi gesäit et allgemeng mat der Auslaaschtung vun de berufsfördernden Ateliere zu Schrasseg aus (Schräinerei etc.) ? Wéi vill Léit ginn do ausgebilt an notzen hir Zäit am Prisong effektiv fir sech op e Liewen duerno ze preparéieren ? Wat sinn d'Grënn firwat dës eventuell net sou genotzt gi wéi et méiglech ass ?



D'staark Heterogenitéit vun der Gefangenenpopulatioun (Originnen, schoulesch an/oder professionell Ausbildung, Haftdauer, Gesondheitszoustand) mécht et onméiglech, vollwäerteg berufflech Ausbildung vu mindestens 3 Joer unzibidden.

Dofir gëtt den Akzent geluecht op:

- d'Vermëttlung vu konkret um Aarbechtsmaart gefrote Kompetenzen,
- déi unhand vu Formatiounen a Zertifikater bestätegt kënne ginn.

D'Schoulbildung an d'berufflech Ausbildung stinn ënner der Kompetenz vum Service de la Formation des Adultes vum Educatiounsministère. Sait kuerzem gëtt et d'Méiglechkeet, verschidde berufflech Formatioune bannent engem Joer ofzeschléissen. D'Prisongsverwaltung steet a Kontakt mam Educatiounsministère, fir d'Kooperatioun ze verbesseren an den Ausbau vun de Formatiounen ze erméiglechen.

## **5. Firwat gëtt et keng speziell Sektoun fir Fraen um Uerschterhaff ?**

Dat huet virun allem domat ze dinn, datt d'Architektur vum Uerschterhaff (CPU) ganz anescht ass wéi déi zu Schrasseg (CPL), an et och net vill Fraen an Untersuchungshaft ginn.

- De CPL huet eng pavillonnaire Struktur mat 8 getrennten Detentiounssektiounen, wou esou Trennungen (z. B. tëschent Männer a Fraen) relativ liicht ëmzesetzen sinn.
- De CPU besteet aus 4 identesche grouse Bléck mat all Kéiers 104 Better op 3 Stäck. Hei ass eng anstänneg Trennung mat engem akzeptabele Personalopwand net wierklech méiglech – besonnesch am Beräich Sport, Medezin, Visite, Educatioun a Fräigang.

Sou ass d'Unzuel vun de Fraen an Untersuchungshaft – déi am Duerchschnëtt eben tëschent 15 a 20 Persoune läit – relativ limitéiert, wat d'Organisatioun vun enger komplett eegener Fraesektoun strukturell a personell am CPU schwéier erméiglecht. An deem Fall wieren d'Fraen ausserdeem immens isoléiert. Am CPL gesinn d'Renovatiounspläng aktuell awer och hei eng Verbesserung vun der Situatioun vir.

Lëtzebuerg, den 2. Mäerz 2026

D' Justizministesch

(s.) Elisabeth Margue